



كريم أوفى - ليبرتيا

كريم أوفى أحمد موسى

٢٥ عامًا

من مواليد القاهرة

شاعر عامية

للتواصل : facebook.com/kimo.doritos

الإهداء ..

إهداء للشُّهدا وللثورة

لـ رفاق الدرب من الأحرار

إلى روح مصطفى متولي

بتحوم حواليا ليل ونهار

إهداء للأهل وللأحباب

إهداء لـ معارفي وللأغراب

إهداء لـ واد مالك ونهال

إهداء لأصحاب جدعان وجُمال

إهداء لـ حكاية مكملتش

ليها ذكرى معايا فـ كُل مكان

إهداء لـ زمان وليالي زمان

إعترافه



أنا بحبك .. وبعترف لك
 أنا عيني زايغة حبتين
 وساعات بتروح شمال ويمين
 لبره الدار
 لكن أنتي اللي قلبي اختار
 يعيش ليكي
 وف عنيكي أنا سرحان ليل ونهار
 وبكتب فيكي أشعاري
 يا نور الروح
 وأخبي فيكي أسراري
 وليكي ببوح ..
 عينيا الزايغة دي يا روعي
 غباء مني
 ده غصب عني نفسي السوء
 بتغلبنني

مفيش راجل مالوش ماضي شيطانه مش خبيث
 ف سامحيني منيش يوسف ولا قديس

التوبة



أنا شيطاني أقوى مني
 دائماً بيغلبني
 وكل ما أقرب خطوة
 أوام بيبعديني
 وشهوتي سايقاني
 لعذاب ملوش آخر
 وف دفتر الحسنات
 أنا شكلي ف الآخر

 ف كلامي بيان شيخ
 صالح ما بين ناسه
 و ف فعلي أنا عفريت
 طالع لأستاذة

 وحاجات كثير جدا
 بتدور جوه راسي
 إزاي بصلي وأصوم
 وإزاي أنا عاصي

وكل ما أنوي أتوب
والتوبة تبقى نصوحة
أوام أعمل ذنوب
والأقي توبتي ممسوحة

يا رب أنا جاي لك
ونفسي تسامحني
حقيقي محتاج لك

من وجعي ريحني
على نفسي قوييني
وغير لي إحساسي
أنا عايز أكون مؤمن
مش عايز أكون عاصي

الكمين



وأكتشفت مرة واحدة
إني خارج ع القانون
وإني كلب لا يسوى حاجة
مكاني أصلاً السجون

كلمتين قالهم جنابه
لما وقفني الكمين
وقال لي وريني بطاقتك
وابتدينا السين وجيم

اسمك إيه ؟
اسمي مصري

فتشوه

ولو لقيتوه مخبي حاجة .. انفخوه
ولو عصلج معاكو .. اضربوه
كلبشوه من إيديه
وظلعوا عين أبوه

بتشتغل إيه ؟
 لسه بدرس
 تدرس إيه ده أنتو فشله
 أنتو فالحين غير ف التظاهر
 وعينكو بجحة ما تختشوش
 كل يوم نموت فيكو
 مش عارف إزاي ما بتخلصوش !

بتدرس إيه ؟
 بدرس قانون
 قانون !!!
 وهي البلد دي فيها قانون .. احنا القانون

القانون الوحيد
 أنت عبد وأنا سيد
 أقول شمال يبقى شمال
 أقول يمين تروح يمين
 على أي حاجة تقول آمين
 فاهم يا بتاع القانون ؟!
 ده أنت كلب لا تسوى حاجة
 مكانك أصلاً السجون

المواطن إنسان



وما دام هعيش ف البلد دي
 هختار أموت راجل
 ولا إني أعيش متهان
 علشان ف البلد دي
 سهل تبقى مواطن
 وصعب تكون إنسان
 هخرج عن المألوف
 ولو يوم الصف مال
 هعمل لوحدى صف
 هقتل بإيدي الخوف

 ولو يوم الجرح زاد
 هضغط عليه هيخف
 الثورة جوه القلب
 والحُر جوه السجن
 والشهدا فوق الراس
 الثورة ما لهاش ذنب
 أنت اللي عايش عبد
 قابل تعيش منداس

سبع أرواح



نفسي أكون ذي القُطط ب سبع أرواح
والعمر يطول قُدامي ويبقى فيه براح

وأعاشر ناس وأصاحب ناس
وأبقى كريم جدًّا ف الإحساس

راجل مع ده .. جينتل مع دي
والضحكه تملي على وشي

وأعامل الناس دايمًا ب الذوق
وأموت فجأة

وأشوف الناس لكن من فوق
أعرف مين فعلاً صاحبي

ومين بيمثل

مين مش فارق عنده موتي

ومين متأثر

مين اللي هيمشي ف جنازتي

ومين هيكسل

همسك غُربال

وهـ أهز كل الناس جواه
واللي هُيقع مش هبكي عليه
واللي هيفضل هفضل وياه

وأعيش تاني

وأبدأ من أول و جديد
أعاشر ناس وأصاحب ناس
وأبقى كريم جدًا ف الإحساس

وأموت وأعيش وأعيش وأموت

وأكرر كل اللي انتقال
وأفضل ماسك ف الغربال
لحد ما ألاقي معايا ناس
تخلص ليا ف حياتي
لحد ما ألاقي معايا ناس
تدعي ليا بعد مماتي

قصة ماتت



بتبان قُدام الناس عادي
بتداري هُمومها وأوجاعها
وبترغي فأي كلام فاضي
بتخاف ليفضحها كلامها

ولو سيرته اتفتحت ف القاعدة
بتضحك وتقول قصة وماتت
مع أنها بتموت م الوحدة
ونفسها ترجع أيام فانتت

أصلها هترُد ب إيه يعني
ده صعب عليها أوي الإحساس
لما تقول سابني وباعني
وتبان مكسورة قُدام الناس

ف بتضحك وتقول مش متفقين
وبنقفش على أسباب تافهة
ووشها يضحك مع إنه حزين
مش عايزه دموها تكسفها

مع إن القصة كانت وردني
وكانت الدنيا بتضحك ليها
فجأة اتقلب الوردني لـ كحلي
وف ثانية الدنيا ضاقت بيها

بتبص لقيته جاي عليها
بيبيكي ويقول لها سامحيني
وكل أصحابها باصيين ليها
فقالته له اعذرني .. كان على عيني

مع إنه واحشها وبتشتاق له
والحُب جواها مش ساكت
لكن كرامتها وجعاها
فضحكت وقالت قصة وماتت

رباعيات



بدلتي ليه الحال
من ضحكة لـ تكشيرة
لخصتي ليه الحلم
ف هجرة وتأشيرة



لا اللي فضلوا فيكي عاشوا
ولا اللي هاجروا بره عاشوا
حتى حقنا ف الحياة
أنتي رفضاه من أساسه



كل اللي ماتوا مبسوطين
إنهم مشيوا وسابونا
حتى بوصوا ع السما
هتلاقوهم مطلعين لسانهم بيغظونا



أنا عُمرِي ما كُنْتُ ف يوم روميو
فما تقنعينيش إنك جوليت



ورا ضحككتها في دموع خايفة لتنزل منها
عاملة قوية قدام الناس وبتدارى ف ضعفها
بس اللي عاشرها وفهمها مُتأكد جدًا إنها
لو مكسورة من جواها عُمرها ما هتخرج نفسها



أنا دفتر قلبي اتملى أشعار
والكل فارقني وبقى فاضي
وأنا عُمرِي ما قلت ف مرة فُراق
دايمًا بتساب وبعيش راضي



يا اللي فاكر كلام الشُعرا بيداي
ما تعشمش نفسك بالنسيان
الشعر مُخدر ما هوش حاوي
و عُمره ما هينسيك الأحزان